

## LLOYD, JOHN ('Einion Môn'; 1792 - 1834), ysgolfeistr a bardd

**Enw:** John Lloyd  
**Ffugenw:** Einion Môn  
**Dyddiad geni:** 1792  
**Dyddiad marw:** 1834  
**Rhyw:** Gwryw  
**Galwedigaeth:** ysgolfeistr a bardd  
**Maes gweithgaredd:** Addysg; Barddoniaeth  
**Awdur:** Robert Thomas Jenkins

Ganwyd yn 1792 ym Mhwllgynnau, Ceidio, Môn. Y mae bron y cwbl a wyddys am ei yrfa i'w gasglu o farwnad ddienw arno, a argraffwyd yn *Y Gwyllydydd* (1834, 375), a'r *Gwladgarwr* (1835, 24). Bu farw ei rieni pan nad oedd ef ond plentyn; bu mewn ysgol yn Llannerch-y-medd; ac aeth (ar adeg anhysbys) i Lundain. Honnir weithiau mai ' cyfreithiwr ' (efallai glerc yn swyddfa cyfreithiwr) oedd, ond y mae'r cofnod o'i farw yn *Y Gwyllydydd* (1834, 288) yn ei ddisgrifio fel ' athraw Ysgol Syr John Cass ' - dywedir fod dau o feibion dug Wellington yn yr ysgol honno, ac y byddai Lloyd yn hyfforddi'r rheini yn eu cartref ar wyliau'r ysgol. Derbyniwyd ef yn aelod o'r Gwyneddigion yn 1827 (**Leathart**, *Origin and Progress of the Gwyneddigion*, 110). Yr oedd hefyd yn aelod o'r Cymreigyddion; bu'n is-lywydd ac yn ' fardd ' iddynt, a phan ymosododd rhai clerigwyr yng Nghymru ar y gymdeithas honno, canodd Lloyd (1829) res o benillion, ' Cymreigyddion Caerludd versus Cleberwyr Diymenydd.' Dengys adroddiadau o gyfarfodydd y Cymreigyddion (yn *Seren Gomer*) y byddai hefyd yn darlithio iddynt. Ond yn 1832, fe'i cawn, yng nghwmni **Griffith Davies**, F.R.S., yn protestio'n erwin yn erbyn tueddiadau gwleidyddol Radicalaidd y gymdeithas (ceir y ddadl yn *Y Gwyllydydd* ac yn *Seren Gomer*). Eto i gyd, os yw'r farwnad yn gywir, yr oedd gynt wedi cymryd rhan flaenllaw yn y brotest yn erbyn cau'r comin a chwalu'r tai unnos ym mhlwyfi Llandwrog a Llanwnda yn Arfon. Byddai'n prydyddu nid yn unig yn Gymraeg ond hefyd yn Saesneg - yn *Seren Gomer* (1832, 55) ceir cyfieithiad gan ' **Eryron Gwylt Wallia** ' (Robert Owen) o gân o'i eiddo, 1831, ar y gwanwyn. Bu farw 3 Awst 1834, yn 42 oed.

### Awdur

**Yr Athro Emeritus Robert Thomas Jenkins**, (1881 - 1969)

### Ffynonellau

Josiah Thomas Jones, *Geiriadur Bywgraffyddol o Enwogion Cymru (AberdŶr 1867-70)*, ii, 228-9  
gwybodaeth gan Mr. R. Owen, a'r cyfeiriadau uchod

### Dolenni Ychwanegol

Wikidata: Q20733549

**Dyddiad cyhoeddi:** 1953

**Hawlfraint Erthygl:** <http://rightsstatements.org/page/InC/1.0/>

PDF Argraffu Cyfeirnod

Mae'r Bywgraffiadur Cymreig yn cael ei ddarparu gan Lyfrgell Genedlaethol Cymru a Chanolfan Uwchefrydiau Cymreig a Cheltaidd Prifysgol Cymru. Mae ar gael am ddim ac nid yw'n derbyn cymorth grant. Byddai cyfraniad ariannol yn ein helpu i gynnal a gwella'r wefan er mwyn i ni fedru parhau i gydnabod Cymry sydd wedi gwneud cyfraniad nodedig i fywyd yng Nghymru a thu hwnt.

Ewch i'n **tudalen codi arian** am ragor o wybodaeth.

**frannu**

Arddull APA

x

Jenkins, R. T., (1953). LLOYD, JOHN ('Einion Môn'; 1792 - 1834), ysgolfeistr a bardd. *Y Bywgraffiadur Cymreig*. Adferwyd 20 Tac 2024, o <https://bywgraffiadur.cymru/article/c-LLOY-JOH-1792>

Priffrwydd

Preifatrwydd a Chwcis  
Hawlfraint  
Y Prosiect  
Cymorth  
Cysylltu

LGC  
NLW

LLYFRGEL  
THE NATION



Ysgrifeddiadau  
Llywodraeth Cymru  
Copied by  
Welsh Government